

元  
詩  
紀  
事

唐宋金詩皆有紀事

金詩紀事未見傳本僅見數則於全金詩中

而元獨無不

可也錢竹汀先生嘗病元史疎蕪欲採各家詩文集及筆記小說之類改修元史恐違功令改爲元詩紀事事詳漢學師承記乃記合元詩紀事於元史藝文志統稱六卷而潛擘堂全書書目已刻未刻均未著紀事之名惟近人陳揆子準稽瑞樓書目於唐宋詩二紀事後載有元詩紀事二冊下注一鈔字据全目例鈔本也潘文勤敘稱子準歿書盡散翁文端公以重價收其藏本僅得三四則元詩紀事鈔本未知尙在其中否也獨念竹汀先生博極羣書尤熟元事果如計厲二書之徧採詩林故實其卷數必哀然以數十計而師承記所稱六卷除藝文志四卷已刻外紀

事纔二卷耳

張尚書書目答問稽瑞樓書目亦止云二冊云三卷未知何据

何其少耶意其爲書必專取夫闕繫元史得失者而與計厲二書之體例則有異焉者也則茲之踵計厲而作也固不爲多事矣抑嘗論之宋詩紀事廣收無事之詩且多采從本集者宋詩經明人棄斥略盡吳之振宋詩鈔曹廷棟宋百家詩存總之不過二百家樊榭以人存詩重在網羅散失故也至元詩則顧選初二三集及癸集家數已燦然大備紀事之體當搜羅一代傳作散見於筆記小說各書者不宜復收尋常無事之詩矣惟見聞彞陋挂漏定復不少異時續有所得當更爲補遺繼出焉侯官陳衍石遺自敘

凡例

一有元詩人上多宋金遺老下多裸將有明今於宋金遺老涉元者如於宋金未登仕版則概入之元其已登宋金仕版入元未仕原不必援之入元顧選於元遺山羅礪谷諸人徑屬之元似欠斷限今仿全金詩列耆舊遺獻之意另編遺老一卷附焉其元末諸人亦於元已登仕版者雖入明尙存仍列之元也

一女真蒙古譯語經 本朝釐定諸家姓名如伯顏當作巴延桑哥當作僧格之類未易僕數但所採詩文集筆記小說多作伯顏桑哥等字今若遽標巴延僧格等字與所採之書兩相歧異轉令閱者茫然故仍

之

一所採詩有一詩多至百十首者則節錄其要如灤京  
雜詠百首止錄有自注者五十四首趙待制詩詞卷  
十八首止錄三首勉學詩二十四首止錄明詩綜誤  
收之一首玉山逸稿七十三首止錄一首以概其餘  
之類

一採書以明代爲限其間及本朝者必本事考據所在  
其泛泛評品概所不登

一春帖子本係一絕句漁父詞向屬諸詩故間採入

元詩紀事總目

卷一

文宗皇帝 順帝

卷二

耶律楚材

楊奐

劉祁

杜仁傑

楊鵬

楊果

趙衍

趙復

李冶

郝經

徐世隆

許衡

王磐

崔斌

高鳴

石國英

王恽

梁曾

徐琬

姚燧

閻復

伯顏

王思廉

王宥

信世昌

劉因

陳伯通

李庭



耶律柳溪

掖舉

鄭雲表

卷三

方回

程鉅夫

葉李

元淮

李思衍

董恢

湯仲友

龔開

劉彥章

于石

呂起猷

許獻臣

葉林

鄧牧

陳觀國

連文鳳

馮澄

楊本然

全璧

呂文老

方德麟

劉汝鈞

翁合老

林子明

劉蒙山

周暎

趙必范

姚潼翔

胡南

姜霖

東必曾

方子靜

朱孟翁

趙必拆

劉時可

許元發

洪貴叔

徐端甫

朱釋老

李萼

陳君用

蔡潭

俞自得

王進之

陳希聲

戴東老

陳文增

劉存行

傅宣山

柳蒼

俞如山

翁自適

郭建德

駱何賓

陳帝臣

俞堃處

林泉生

傅九萬

魯仕能

吳鉞

李應春

羅太昌

羅太亨

林清

熊朋來

卷四

吳澄

倪南杰

黃泰亨

龍仁夫

羅志仁

白珽

仇遠

鮮于樞



趙孟頫

陳儼

吾邱衍

胡長孺

徐明善

陳孚

馮子振

曹伯啟

鄧文原

張瑛

俞伯奇

劉應龜

宋无

艾性夫

朱浚

高克恭

李材

李性學

卷五

戴表元

李孟

袁易

戴天錫

黃玠

盛彪

袁桷

虞集

王克敬

謝文質海牙

范玉壺

小雲石海涯

王士熙

柳貫

梁相

陳堯道

吳珥

黃景昌

陳舜道

任士林

何中

滕斌

郭天錫

張菊存

何失

汪炎祖

陳森

段天祐

趙由儕

孫轍

卷六

王振鵬

劉鶚

陳櫟

吳彬

馬祖常

楊載

范梈

揭傒斯

黃潛

許晉孫

呂權

韓性

丁復

應夢虎

歐陽玄

許有壬

洪震老

辛鈞

陳繹曾

韓信同

汪澤民

吳萊

張翥

趙雍

葉森

鄭采

鄭禧

黃敏

汪子才

徐天資

沈君清

孫鳳洲

傅子建

卷七

宋本

吳師道

三寶柱

宋襲

呂思誠

廖毅

陸居仁

李黼

薩都刺

楊維禎

胡善

焦文炯

幹玉倫都

甘立

柯九思

雅琥

楊瑀

赫德爾

林泉生

何正

黃鎮成

陳楚春

卷八

吳鎮

陳方

潘純

陳旅

傅若金

黃裳

余闕

李邴

宇文公諒

蔡廷秀

李介石

樊執敬

魯至道

陳柏

迺賢

李孝光

岑安卿

陳樵

沈右

謝宗可

黃公望

同同

貢師泰

黃季倫

李廷臣

呂誠

賈策

堵簡

楊椿

邊魯

完澤

謝寅

徐夢吉

楊慶源

劉肅

康瑞

李庸

朱彬

陸繼善

鄭賀

歐陽公瑾

高克禮

屠性

李元珪

陳聚

張渥

陸元泰

馬稷

繆侃

任昱

蔣克勤

錢大有

周溥

留睿

張田

張師賢

顧敬

朱庸

李一中

陳樞

莊蒙

嚴恭

宋元禧

張世昌

馬貫

曹睿

張守中

沈性

燕不花

許有孚

許楨

馬熙

濮彥仁

朱守諒

黃德廣

卷九

錢惟善

盧琦

孔晄

張翥

成廷珪

陸仁

高明

謝應芳

金涓

袁介

達不花

楊允孚

方子京

陳高

周志遠

鄭玉

陳謙

鄭元祐

顧觀

伯顏

舒頔

周必達

沈貴

潘時雍

顧素

沈貞

韓介玉

程渠南

魯琪琳

卷十

顧瑛

倪瓚

王冕

郊韶

葉廣店

吳復

郭翼

馮士頤

不花帖木兒

掌機沙

聶鏞

郭庸

王立中

熊進德

徐哲

卞思義

瞿士衡

文質

時太初

顧亮

李費

顧元臣

盧浩

吳禮

趙恒

陸煥然

胡井裘

王士毅

魯淵

沙可學

邾經

曾朴

周南

陳思

吳敬夫

鄧雅

呂之英

顧佐

顧晉

韋珪

申屠衡

卷十一

張昱

王逢

張思孝

戴良

賁性之

趙汭

吳志淳

梁寅

張翼

丁鶴年

張簡

陳有定

張憲

陳秀民

陳基

卞元亨

方行

孔從善

劉仁本

謝理

王霖

諸綱

徐昭文

鄭彝

張溥

吳徹

芝麻李

卷十二

遺老

元好問

白賁

楊宏道

羅椅

劉辰翁

熊禾

高晞遠

牟巖

李珣

魏新之

何鳴鳳

高鎔

陳杰

林月香

卷十三

無時代

趙永嘉

武伯英

金方所

于演

李宗洌

徐孟岳

吳仁叔

吳伯慶



楊鵬翼

張明

侯友彰

何有成

劉淵

郭正平

張孟

張起

韃啞

卷十四

道流

邱處機

王元粹

聶碧窗

梁大柱

吳全節

李道坦

黃石翁

王與敬

彭日隆

朱本初

張雨

鄒復雷

富恕

余善

于立

鄧青陽

卷十五

釋子

子溫

有規

德豐

淨權

存誠

了慧

有在

溥光

明本

行端

圓至

善住

本誠

梵琦

祖柏

若舟

宗衍

文信

普惠

椿

良震

照

自悅

如阜

福報

寧

天如

明

清濬

越僧

禪僧

遊僧

無名僧

五

卷十六

宮掖

駱妃

程一寧

凝香兒

順帝宮人

卷十七

閨閣

管道昇

杜氏婦

余氏

吳氏

孫淑

鄭允端

張妙淨

張玉娘

曹妙清

劉氏

韓氏

李氏

萬氏

趙氏

陳氏

曠家婦

徐綵鸞

劉氏

何氏

胡妙端

董淑貞

薛蘭英  
蕙英

賈娉娉

卷十八

女冠

元氏

卷十九

妓女

徐氏

羅愛卿

暨氏

卷二十

藩屬

阿蘊主

楊洲海

段寶

段僧奴

陳日照

陳日烜

陳日燿

陳日燿

陳遂

阮聖訓

范五老

陳元旦

范邁

阮忠彥

黎括

陳愛山

卷二十一

無名子共六十五人

卷二十二

卜仙

馬巫父

三茅吳真人

鄭文選

張君有

方武襄

王大圭

趙靜齋

獨樂園主

密蘭沙求仙詩

卷二十三

仙神鬼怪

大滌洞天仙人

羽客

水仙祠神

衛芳華鬼 鄭婉娥鬼 華亭二生 仙方詩

晚翠亭詩 荊州鬼語

卷二十四

歌頌謠諺識謎雜語共五十二首

元詩紀事卷一

侯官 陳衍 緝

文宗皇帝名圖帖睦爾武宗次子初封懷王即位改元天  
歷至順在位五年

黃文獻集天歷二年三月上肇開奎章閣延登儒  
流至順二年正月御製閣記成萬機之暇親瀝宸  
翰書閣記刻置禁中

自建康之京都途中作

穿了縠衫便著鞭一鈎殘月柳梢邊兩三點露滴如雨五  
六個星猶在天犬吠竹籬人過語雞鳴茅店客驚眠須臾  
捧出扶桑日七十二峯都在前

草木子梁王登寶位時自建康之京都途中當作  
一詩云云

月山詩話明太祖早行詩忙著征衣快著鞭轉頭  
月挂柳梢邊兩三點露不爲雨七八個星尚在天  
茅舍雞鳴人過語竹籬犬吠客驚眠等閒擁出扶  
桑曰社稷山河在眼前案此篇乃元文宗自集慶  
路入正大統途中所作不知何以載入明祖集中  
且竄易十數字又案居易錄云兩三條電欲爲雨  
四五個星猶在天乃五代盧延遜山寺詩文宗勦  
取之

順帝名妥懽帖睦爾明宗長子在位三十六年改元元統

至元至正明太祖滅之奔沙漠元亡

北平錄以元主不戰而奔克順天命今殂特諡曰  
順帝

庚申外史瀛國公初爲僧居白塢寺中已而奉詔  
居甘州山寺有趙王者嬉遊至寺憐其老且孤留  
一回回女子與之延祐七年四月十六夜生一子  
明宗適自北方來早行見寺上有龍文五采氣即  
物色得之因求爲子并載其母以歸  
菽園雜記皇宋第十六飛龍元朝降封瀛國公元  
君召公尚公主時承錫宴明光宮酒醒伸手扒金  
柱化爲龍爪驚天容元君含笑語羣臣鳳雛寧與

凡禽同侍臣獻謀將見除公主泣淚沾酥胸幸脫虎口走方外易名合尊沙漠中是時明宗在沙漠締交合尊情頗濃合尊之妻夜生子明宗隔帳聞笙鏞乞歸行宮養爲嗣皇考崩時年甫童元君降詔移南海五年乃歸居九重憶昔宋祖受周禪仁義綽有三代風至今兒孫主沙漠吁嗟趙氏何其隆此詩爲閩人俞應所作至今兒孫之句言元君避歸沙漠後事

### 答明主

金陵使者渡江來漠漠風煙一道開王氣有時還自息皇恩何處不昭回信知海內歸明主亦喜江南有俊才歸去誠心煩爲說春風先到鳳凰臺

翦勝野聞元君旣遁復留兵開平猶有覬覦之志太祖遣使馳書明示禍福因答詩云云



元詩紀事卷二

侯官 陳 衍 緝

耶律楚材字晉卿遼東丹王突欲八世孫金尙書右丞  
履之子元太祖召見處之左右太宗朝拜中書令  
薨於位至順元年贈太師追封廣甯王諡文正有

湛然居士集

元朝名臣事畧公以明昌元年六月二十日生父  
獻公通術數尤邃於太元私謂所親曰此子吾家  
千里駒也他日必成偉器且當爲異國用因取左  
氏之楚雖有材晉實用之以爲名字

句

開罇傾美酒擲網得新魚 釀酒無輸課耕田不納租  
避兵開邃穴防水築高臺六月常無雨三冬却有雷 園

林無盡處花木不知名 衝風磨舊麥懸碓杵新粳春月  
花渾謝冬天草再生 每春忘舊閨隨月出新年強策渾  
心竹難穿無眼錢 食飯稱斤賣金銀用麥分 黃橙調  
蜜煎白餅糝糖霜救旱河爲雨無衣壘種羊

庶齋老學叢談湛然居士集有河中府詩十首尋  
思干城西遼稱河中府詠其風景開樽各云云西  
人用風磨如南方水磨春則懸杵春月各云云余  
嘗閱唐會要有壘種羊未之信觀此信有之公自  
注西人不計閨

楊奐字煥然乾州奉天人太宗詔試諸道進士奐試東  
平兩中賦論第一官至河南路廉訪使諡文憲有  
還山集

還山集君甫勝衣嘗信口唱歌有紫陽閣之語扣  
之不能答也未冠夢遊紫陽閣景趣甚異後因以

自號初泰和大安閒入仕者惟舉選爲貴科榮路  
所在人爭走之程文之外翰墨難體悉指爲無用  
之技尤諱作詩君舉業既成乃以餘力作爲詩文  
下筆即有可觀在鄂下日中秋燕集一寓士忌君  
名諷諸生作詩請君屬和君被酒謂客曰欲觀詩  
者舉酒欲和以次唱韻筆不停綴長韻短章終夕  
成三十九首長安中目爲鄂郊即席倡和詩傳之  
禮部閑閑趙公平章政事蕭國侯公內翰馮公屏  
山李公皆折行位與相問遺

### 試萬甯宮

月澹長楊曉色清大題飛下寂無聲南山霧豹文章在北  
海雲鵬羽翼成玉檻玲瓏紅露重金爐縹緲翠煙輕誰言  
半夜曾前席白日君王問賈生

元文類楊奐跋趙太常擬試賦稿後當泰和丙寅  
春三月二十五日萬甯宮試貢士上躬命賦題曰  
日合天統侍臣初甚難之而太常卿北京趙公適  
充御前讀卷官獨以謂不難即日奏賦議乃定既

而中選者纔二十有八人僕時甫冠獲試廷下而  
席屋偶居前列朝隙聞異香出殿櫺間一紫衣顧  
予起問題之難易及名氏里贊年齒而去少頃復  
相慶曰適駕至耳薄暮出宮傳以爲希遇所謂月  
澹云云者少作也無可取以紀一時之事云

錄汴梁宮人語十九首

一入深宮裏經今十五年長因批帖子呼到御床前  
歲歲逢元夜金蛾鬧簇巾見人心自怯終是女兒身  
殿前輪直罷偷去賭金釵怕見黃昏月殷勤上玉階  
翠翹珠掘背小殿夜藏鈎驀地羊車至低頭笑不休  
內府頒金帛教酬賀節盤兩宮新有旨先與問孤寒  
人閒多棗栗不到九重天長被黃衫吏花攤月賜錢  
仁聖生辰節君王進玉卮壽棚兼壽表留待北還時

遶奏行臺急東華夜啟封內人催步輦不待景陽鐘  
畫燭雙雙引珠簾一一開輦前齊下拜歡飲解寒杯  
聖躬香閣內只道下朝遲扶杖嬌無力紅綃貼玉肌  
今日天顏喜東朝內宴開外邊農事動詔遣教坊回  
駕前雙白鶴日日候朝回自送鑾輿去經今更不來  
陡覺文書靜相將立夕陽傷心甯福位無復夜熏香  
二后睢陽去潛身泣到明却回誰敢問校似有心情  
爲道圍城久粧奩鬪犒軍入春渾斷絕飢苦不堪聞  
監國推梁邸初頭靜不知但疑牆外笑人有看宮時  
別殿弓刀響倉皇接鄭王尙愁宮正怒含淚強添粧  
一向傳宣喚誰知不復還來時舊鍼線記得在窗間

北去遷沙漠誠心畏從行不如當日死頭白若爲生

輟耕錄楊文憲公與嘗作汴故宮記云云公又有錄汴梁宮人語五言絕句一十九首雖一時之所寄興亦不無傷感之意云云

讀通鑑作

風煙慘淡駐三巴漢燼將燃蜀婦髮欲起溫公問書法武侯入寇寇誰家

輟耕錄霍治書云楊煥然先讀通鑑至論漢魏正閏大不平之遂修漢書駁正其事因作詩云云後攻宋軍回始見通鑑綱目其書乃寢

謁廟

會見春風入杏壇奎文閣上獨凭闌淵源自古尊洙泗祖述何人似孟韓竹簡不隨秦火冷楷林高倚魯城寒漂零

蹤跡千年後無分東家寄一簞

山房隨筆楊煥然號關西夫子題孔子廟云云

劉祁字京叔渾源人舉金進士廷試失意歸國初戊戌  
詔試儒人祁就試魁西京選充山西東路考試官  
有神川遜士集

金史值金末喪亂作歸潛志以紀金事修金史者  
多採用焉

寄高丞相

青雲自致不須階十稔從容位上台負荷一堂森柱石調  
和衆口費鹽梅勤勞密邇三朝重壽考康甯七秩開家道  
益昌孫有息綵衣扶杖好歸來

歸潛志高丞相巖夫在相位因元光二年元日慶  
七十會鄉里交舊且求作詩文時先子以新罷御

史避嫌不起余方弱冠爲作詩以公頗負謗且勸其退休也公得詩大喜趣召余迎謂余曰解道青雲自致不須階耶又撫余背曰汝費字如何下來蓋余詩云云

贈鮮于伯機

憶昔逢君北渚秋藕花香裏醉輕舟三年一別空回首千里相思更倚樓明月不隨春物老碧山長帶暮雲愁天平松竹黃華水早晚柴車得共遊

思君一日如三載兩寄詩來慰我心塵土愈知人世隱風煙遙見海門深貧來笑我常癡坐亂後憐君更苦吟歷下亭前春水闊扁舟何日重相尋

困學齋雜錄平生交遊贈余詩者多矣唯劉京叔二篇嘗吟詠之二云云

句



元猿哭處江天暮白雁來時澤國秋

歸潛志夢中作詩或得句多清邁出塵余先祖龍山君夢得句云山路嶄有壁松風清無塵先子夢中詩云落月浸天池余幼年夢中亦作詩云云如鬼語也

杜仁傑字仲梁又字善夫濟南長清人不仕以子貴贈

官諡文穆

遺山集麻信之杜仲梁張仲經正大中同隱內鄉山中以作詩爲業予嘗竊評之仲梁詩如偏將軍將突騎利在速戰屈於遲久故不大勝則大敗仲經守有餘而攻戰不足故勝負畧相當信之如六國合從利在同盟而敵於不相統一有連難不俱棲之勢雖人自爲戰而號令無適從故勝負未可知  
又仲經有詩云寒客遠峯猶帶雪暖私幽圃已多  
花仲梁雖有暖散春泉百汭流之句亦自以爲不及也

謝嚴相

高臥東窗興已成  
簾鉤無復挂冠聲  
十年恩愛淪肌髓  
只說嚴家好弟兄

絕句

高燒銀燭照雲鬟  
泐耳笙歌徹夜闌  
不念征西人萬里  
玉關霜重鐵衣寒

山房隨筆杜善甫不屑仕進遊嚴相之門嚴迺濟南望族善甫爲所敬重一曰讒者間之情分浸乖杜謝以詩云云嚴悟歎密如初時有掌兵官遠戍於外其妻宴客笙歌終夕善甫詩云云聞者快之有薦之於朝遂召之表謝不赴中二聯云俾獻言於乞言之際敢盡其忠若求仕於致仕之年恐無此理不能爲白居易漫法香山居士之名惟願學陸龜蒙拜賜江湖散人之號

楊鵬字飛卿

困學齋雜錄紫羅凡凡道人楊鵬字飛卿一名雲鵬少梁人北渡後終於東平有陶然集

句

樹古葉黃早僧閒頭白遲

遺山集其死生於詩者汝海楊飛卿一人而已李  
內翰欽叔工篇翰而飛卿從之遊初得云云之句  
大爲欽叔所推激從是遊道日廣而學亦大進客  
居東平將二十年有詩近二千首所賦青梅瑞蓮  
餅聲雪意或多至十餘首

楊果字正卿祁州蒲陰人金正大初登進士第國初起  
爲幕官官至參知政事諡文獻有西菴集

元史類編參政李蹊行大司農於許昌果以詩送  
之蹊大稱賞歸言於朝用爲偃師令

題趙輔之樊川圖

一賦阿房萬古傳而今還有趙樊川謝公墩上王公住異  
代風流各自賢

牧庵集趙樊川集序中舍杜牧名其集爲樊川公  
居二曲之間余少之時屢至焉其地先甚荒棄由  
爲公有歲新而月盛之泉石巖洞池塘林木出沒  
窈窕魁奇繁薈凡可娛心而駭目者悉甲其鄰人  
亦曰公樊川中統之初京師諸貴詩其圖者惟楊  
公西菴爲絕倡云云  
案困學齋雜錄第二句作豈知今有趙樊川

## 趙衍

元史耶律希亮楚材之孫師事北平趙衍  
案元文類宋子貞中書令耶律公神道碑稱進士  
趙衍

## 七真洞題壁

紛披容與縱笙歌  
蕙轉光風豔綺羅  
露濕桃花春不管  
月明芳草夜如何  
璫珠浩蕩隨蘭櫂  
雲旆低徊射玉珂  
深入醉鄉休秉燭  
盡情揮取魯陽戈

四溟詩話予客京師遊翠巖七真洞讀壁上詩云  
云耶律丞相門客趙衍所作清麗有味頗類唐調  
惜乎大元風雅不載故表而出之

趙復字仁甫德安人太宗時從姚樞北行世祖在潛邸  
嘗召見不仕終

牧菴集歲乙未王師徇地漢上先公得故江漢先  
生見公戎服而髯不以華人士子遇之至帳中見  
陳琴書愕然曰公亦知事此耶公爲之一莞以九  
族殫殘不欲北公止共宿既覺月色爛然惟寢衣  
留故所公遽鞍馬周號於積尸間行及水裔見已  
被髮脫履仰天而祝蓋蹈水未入也公曰徒死無  
義可保君而北無他也至燕名益大著  
案元文類趙復楊紫陽文集序自稱前鄉貢進士

寄皇甫庭

寄語江南皇甫庭此行無慮隔平生眼前漫有千行淚水

自東流月自明

已卯年

自遣

醉乘鸞馭到仙家彩筆雲箋賦落霞老去空山秋寂寞自鋤明月種梅花

困學齋雜錄江漢先生趙復武昌之役始初渡江時寄皇甫庭云云又自遣云云人甚稱之案次首首句雜錄又作乘雲曾到玉皇家

李冶字仁卿號敬齋真定樂城人登金正大末進士第北渡後世祖在潛邸被徵官至翰林學士

元朝名臣事畧屏山李先生令代作墓銘數篇一夕而就屏山大加賞異

又四賢堂記遺山敬齋自南都時才名已相埒北渡後嘗往來西州賡唱迭和世亦謂之元李

贈李和之

元化機關不死根自消自息自氤氲暖於燄燄九微火輕

似飄飄三素雲白玉池心流曉潤紫金爐口爇餘熏未知  
與道相應否試作新詩一問君

敬齋古今難予少小多疾故常求所以攝養之方雖不得升堂曉截亦竊得其藩籬曩寓崑山之桐川嘗與李鼎之和論及於此之和選於性命者也似有印可意予因贈之以詩云云

郝經字伯常澤州陵川人憲宗元年世祖在潛邸召見  
留王府官至翰林學士諡文忠有陵川集

### 帛書詩

霜落風高恣所如歸期回首是春初上林天子援弓繳窮  
海紫臣有帛書

宋學士集霜落云云中統十五年九月一日放雁獲者勿殺國信大使郝經書於眞州忠勇軍營新館右郝文忠公帛書五十九字博二寸高五寸背有陵川郝氏印方一寸文透於面可辨識蓋中統

元年三月辛卯元世祖登極欲告即位定和議於  
宋四月丁未授公翰林侍講學士佩金虎符充國  
信使以行宋相賈似道拘留餞真不遣至元十一  
年六月庚申下詔伐宋問執行人之罪時公在儀  
真已十五載以音問久不通乃於九月甲戌用蠟  
丸帛書親繫雁足祝之北飛十二月丙辰伯顏南  
征之師竟渡大江十二月庚午似道懼送公歸國  
三月虞人始獲雁於汴梁金明池四月公至燕師  
而七月辛未遂卒年僅五十三爾其書中統十五  
年即至元十一年南北隔絕但知建元爲中統也  
十三年正月宋亡帛書爲安豐教授王時中所得  
延祐五年春集賢學士郭貫出持淮安使節獲見  
焉遂奏於朝勅中使取之仁宗詔裝潢成卷翰林  
集賢文臣各題識之藏諸東觀或謂世祖見書有  
四十騎留江南曾無一人如雁之歎遂興師伐宋  
皆好事者傳會之談  
梧溪集先是有以雁四十餉公內一雁體質稍異  
命畜之雁見公輒張翮引吭而鳴公感悟手書尺  
帛親繫雁足且致祝曰累臣某敢傾雁贈通信朝  
廷雁奮身入雲而去未幾虞人獲之苑中以所繫  
帛書託近侍以聞上惻然曰四十騎留江南曾無  
一人雁比乎遂進師南伐



徐世隆字威卿陳州西華人金正大四年登進士第世  
祖在潛邸召見之官至山東等道按察使有威卿  
集

元朝名臣事畧丞相安圖再相徵得老成人共政  
奏公雖使之坐而策國事亦尚有賴召之公老病  
辭不能行附奏便宜九事賜田十頃時年八十其  
秋疾增劇作八十可老歌以自遣

### 哭文丞相

當今不殺文丞相君義臣忠兩得之義似漢王封齒日忠  
如蜀將斬顏時乾坤日月華夷見嶺海風霜草木知只恐  
史官編不盡老夫和淚寫新詩

雪舟謠語文山在獄中時北人有詩云云  
七修類稿此作膾炙人口久矣但文山集與輟耕  
錄作徐世隆史鑑與風化錄作王磐然二人皆元  
學士無文集可查國史中又不載也

案庶齋老學叢談亦作徐威卿

許衡字仲平河內人世祖出王秦中徵授京兆提學官  
至集賢大學士兼國子祭酒諡文正學者稱魯齋  
先生有魯齋集

西軒客談許魯齋仕元世祖朝以哈麻短毀漢法  
不得行其學力求歸田觀其與人書有春日池塘  
云云

許魯齋集若夫春日池塘秋風禾黍夏未雨蠶老  
麥收冬將寒困盈箱積門喧童稚架滿詩書山色  
水光詩懷酒興是以心思意向曰曰在此言亦此  
書亦此百周千折必期得此而後已  
元朝名臣事略先生疾甚曳杖於門曰予心怍怍  
然瞑目坐久之歌朱子睡起床風瑟瑟覺來山月  
團團身心無累久輕安况有清涼池館小詞歌罷  
奄然而逝

辭召命作

一天雷雨誠堪畏千載風雲漫企思留取閒身臥田舍靜  
看蝴蝶挂蛛絲

山房隨筆許仲平學問文藝爲世所尊稱爲夫子有辭召命詩云云可以觀其志矣

王磐字文炳廣平永年人登金正大四年進士第中統  
元年擢益都等路宣慰副使官至翰林學士承旨  
諡文忠有鹿菴集

### 題三陪圖

寺主善爲無米飯病人要喫沒錢鍼皇都詩老多才思收  
拾酸寒入笑林

困學齋雜錄中朝名士有以木庵陪飯賣太師陪  
針王狀元陪口作三陪圖徵詩當代名勝爲一例  
者鹿庵先生題云云

羗里城文王廟

羗水淺且清羗里餘荒城文王德如日曾此夷其明陝樹  
憩召伯箕山栖許生後人起敬愛木石含芳榮嗟爾一坏  
土耕犁未全平千秋不磨洗永被囚聖名我行蕩陰道過  
之爲停征念昔有殷季虐主方狂醒銛鋒戮賢聖若刈寸  
草莖左啖鄂侯脯右啖鬼侯羹茲時無羗里何以紓淫刑  
羗里深杳杳羗城高亭亭君王在縲紲不異南面聽淑氣  
發神慮淳和助心靈演開伏羲畫剖出天地精一時雖冥  
昧萬古垂日星若無羗里拘易經何由成易經在所重羗  
里那可輕

河朔訪古記羗里城文王廟在湯陰縣北六里門  
勝題曰羗里城周文王之廟大元至元六年夏十

有二曰建鴈壁龕翰林承旨永年王磐五言古詩  
石刻一通云云

崔斌字仲文馬邑人世祖在潛邸召見應對稱旨官至  
江淮行省左丞爲阿合馬所害追諡忠毅

弔李肯齋

一夕司空撫御床祖龍未死國先亡只緣西楚無堅壁致  
使南州總戰場湘水一川骸骨滿肯齋千古姓名香我來  
不見先生面獨對西風酹一觴

隱居通議相士葉秋月誦北人崔參政弔潭帥李  
肯齋詩云云

庶齋老學叢談左丞崔公仲文斌弘州人資兼文  
武重道崇儒統兵平湖湘時潭帥李肯齋帶城將  
破舉家自刑繼之以火忠義大節天下咸知公弔  
以詩云云

案叢談缺第三句據通議補

金山

浩浩長江天際來中流砥柱獨崔巍風搖萬壑秋聲動潮  
捲千堆雪浪迴山勢參差現靈鷲海波遼闊隔蓬萊夕陽  
不盡登臨意倒瀉滄溟入酒盃

庶齋老學叢談左丞崔公仲文題金山詩二云云

高鳴字雄飛寄嵐人元初官至吏部尙書

獨石

一塊蒼頑石頽然半水濱可憐閭立本徒寫五湖真

題杜莘老華山圖

上方可望不可到今日興來時臥游須信丹青有神化世  
間隨處是同州

困學齋雜錄高雄飛獨石詩云云題杜莘老華山圖云云

石國英號月洲宿州靈璧縣人元初官至福建宣慰

雁蕩能仁寺遺詩

我行天下山水半側身西望長嗟嘆山到蜀川方絕奇世  
殊久被微官絆萬里提兵雁蕩來高牙一展嵐霧開松風  
吹騎聯鑣入高日下照繡經臺老僧振錫去何所香篝寂  
寂佛無語山鳴谷應應者誰似有秦民宅幽阻姑休爾旅  
枕爾鋌雲深不得驚龍眠水晶一派瀉琤玉歲與清氣中  
洄沿二三溪碓長林下人力罷春天所借草香花淨太古  
春虎嘯猿吟明月夜幽尋靜勝登嵯峨鸞旗柱筆光影摩  
詩成寫破峭壁翠稽首巖前諾巨那

梧溪集題石安撫雁蕩能仁寺遺詩後公曾孫宣武將軍松江萬戶瓊嘗乘遠道經寺得是詩於老僧今年春訪予風雨下因出卷誦之殆見公存心仁律下嚴悠然雅歌而神采炳如也

王惲字仲謀衛州汲縣人中統元年由詳議官授中書省詳定官官至翰林學士諡文定有秋澗集

玉堂即事

陰陰槐幄幕閒庭靜似藍田縣事廳細草近緣春雨過映階侵戶一時青  
日長上直玉堂廬思入閒雲待卷舒重爲明時難再遇等閑羞老魚蠹書

玉堂嘉話宋相李昉春日玉堂即事有云一院有花春盡永四方無事簡書稀予夏日玉堂即事亦有二絕句云云



口號

隔夜端門分板位平明簪笏列駕行紫雲低覆千官入潤  
作金爐百和香

玉堂嘉話至元十五年戊寅正月甲寅乙酉朔同  
李侍講德新應奉李謙陪百官就位望拜行在所  
凡七拜其侍儀司先一日於端門兩闕間灰界方  
所以板書百官號隨各司依品秩作等列班定以  
次入宮行禮禮畢由左掖門出風埃大作所謂出  
門塵漲如黃霧始覺身從天上歸曾有口號云云  
梁曾字貢父燕人中統四年薦辟中書左三部令史官  
至集賢侍講學士

悼鮮于伯幾鶴

翠柏屏前竹闌曲幾見毵毵雪衣舞平生風雲萬里心零  
落湖山一邱土世間萬事不可虞奇禍何由也到渠不見

稽康遭殺戮令人空歎養生書

西湖志餘伯幾有鶴死非命挫之西湖士夫多有詩悼之梁曾詩云云

徐琬字子方號容齋又自號汝叟東平人至元初薦爲

陝西行省郎中官至翰林學士承旨諡文獻

題萊州海神廟

龍宮高拱六鼇頭六合乾坤日夜浮貝殿走珠蛟構室戟門烘霧蜃噴樓中原右顧真孤島外域東漸更九州咫尺琛航倭濊近好將風浪戒陽侯

庶齋老學叢談中丞容齋徐公人物偉岸襟度寬洪文學吏才筆不停思題萊州海神廟云云通之狼山僧舍有墨蓮公肆筆成長篇九工綴建臺揚州日確齋荀公雪樓程公校官胡石塘倡和無虛日亦一時之文會也

句

一竅鬼工開混沌八蠶神繭墮扶桑

玉堂嘉話徐子方蘭瓶詩云云

姚燧字端甫柳城人後遷洛陽文獻公樞之姪至元八年爲秦王府文學官至翰林學士承旨諡曰文有

牧菴集

題園肚詩

八十年來遇此春此春過後更無春縱然不得扶持力也  
作墳前拜掃人

草木子牧菴學士致政於家年八十時夏日沐浴有侍妾在側因私焉公起妾前拜曰主公年老賤妾尙有娠家人必見疑願賜識驗公因捉其園肚題詩於上云云公薨後妾果有子家人疑其外通

妾出詩遂解

閻復字子靜其先平陽和州人徙居高唐至元八年薦  
爲翰林應奉官至翰林學士承旨諡文康有靜軒  
集

元史扈駕上京賦應制詩二篇寓規諷意世祖顧  
和禮霍孫曰有才如此何可不用

梅枝拄杖

斫取江南萬玉柯春風入手慣摩挲  
較清邛竹能香否  
品鳩籐奈俗何聲破夢寒霜滿戶影隨詩瘦月橫坡人言  
功在調羹上不道扶持力更多

吳禮部詩話閻子靜初挾其鄉人書如京謁賈仲  
明以梅枝拄杖爲獻適姚公茂諸人至賈因見閻  
道其故諸公令賦梅枝詩閻因賦云云諸公延譽  
遂知名

伯顏蒙古巴林部人至元十一年拜中書左丞相總兵  
伐宋官至開府儀同三司薨贈太師封淮安王諡  
忠武

玉堂嘉話初宋未下時江南謠云江南若破白雁  
來過當時莫喻其意及宋亡蓋知指丞相巴延也  
過梅嶺岡留題

馬首經從庾嶺回王師到處悉平夷擔頭不帶江南物只  
插梅花一兩枝

七修類藁伯顏下江南過金陵梅嶺岡詩云云所  
以著名亦有是善

王思廉字仲常真定獲鹿人至元十年世祖召見官至  
翰林學士承旨諡文恭

壽陽梅圖

一聲白雁渡江潮便覺金陵王氣銷畫史不知亡國恨猶將鉛粉記前朝

西湖志餘錢選字舜舉宋末時人入元以工畫花鳥名江南王思廉題其壽陽梅圖云云

王宥字東平人官中書省郎中

歸婦吟

烈火都將玉石焚死生契闊憶中分信音一絕思青鳥望眼雙穿見白雲殘日鵲鴿還有難北風鴻雁正離羣新詩送爾還家去重續當年織錦紋

山房隨筆北方王郎中宥有歸婦吟其序曰天馬浮江兵強將銳所征無敵所掠無遺俘戮之民奚啻億萬然生死存亡悲歡聚散豈無數存乎其間夫劉氏者吉之永豐人也問其父母兄弟舅姑夫與子皆在焉夫我不知則已既知之何獨不令其歸甯於父母乎嗚呼不幸之幸莫大於斯故不可

無一言以送之

信世昌字雲甫東平人官至翰林學士承旨

樂府

東風吹落花紛紛辭故枝莫怨東風惡花有再開時

句

宗廟有靈賢相出黔黎無患太皇明

歸田詩話信雲父山東人元兵南下爲張宏範元帥館客文山被獲宏範命雲父款待之日侍談論頗有向南之意贈文山詩宗廟云云文山因教以詩法即領悟作樂府云云文山稱賞

劉因字夢吉保定容城人初名駟字夢驥表所居曰靜修至元十九年徵拜右贊善大夫二十八年召爲

集賢學士固辭不起諡文靖

林泉隨筆劉靜修詩古選不減陶柳其歌行律詩直邇盛唐其爲文章如田孝子碑輞川圖記等作皆正大光明

### 讀史

紀錄紛紛已失真語言輕重在詞臣若將字字論心術恐有無邊受屈人

薛文清公集道盡作史之弊

### 詠曾點

獨向舞雩風下來心齋門外欲生苔歸時過著顏家巷說與城南花正開

庶齋老學叢談靜修集讀史詩云云殊非確論修史自有定例謂如其人功十而過一本傳不書其過十功豈不能贖一過其過必於他傳見之其人過十而功一傳必書其功謂其人豈無一善可書



或有常書之事本傳不載者必於他傳見之其例甚多未易縷陳又詠曾點云云此猶非也坐忘乃莊子之說借孔顏之名以形容道妙非孔門實事以此求顏子則誤矣未可以私意立說輕於訾毀聖賢况顏子與聖人僅隔一壁城南之花豈足動其心語意大欠持擇

### 書事三首

當年一線魏瓠穿直到橫流破國年草滿金陵誰種下天

### 津橋上聽啼鵲

升庵詩話補遺劉文靖公因書事絕句云云宋子虛詠王安石亦云投老歸耕白下田青苗猶未罷民錢半山春色多桃李無奈花飛怨杜鵑二詩皆言宋祚之亡由於安石而含蓄不露可謂詩史矣臥榻而今又屬誰江南回首見旌旗路人遙指降王道好似周家七歲兒

南濠詩話劉靜修書事詩云云周公謹雜識載北客詩憶昔陳橋云云二詩皆爲宋太祖作者若出

一機軸而辭意嚴正可謂詩之斧鉞矣

馮道

亡國降臣固位難  
癡頑老子幾朝官  
朝梁暮晉渾閒事  
更捨殘骸與契丹

筆精馮道歷事四朝後世羞之歐公作史謂無廉恥史斷諸賢紛紛訾議不如元劉靜修一絕約而盡也云云

宋理宗南樓風月橫披二首

試聽陰山勅勒歌  
朔風悲壯動山河  
南樓煙月無多景  
緩步微吟奈爾何

物理興衰不可常  
每從氣運見文章  
誰知萬古中天月  
只辦南樓一夜涼

西湖志餘理宗嘗畫南樓風月橫披有併作南樓  
一夜涼之句靜修題詩云云蓋才到中天萬國明  
宋太祖月詩也

### 白雁行

北風初起易水寒北風再起吹江干北風三吹白雁來寒  
氣直薄朱崖山乾坤噫氣三百年一風掃地無留殘萬里  
江湖想瀟灑佇看春水雁來還

西湖志餘先是臨安有謠云江南若破白雁來過  
蓋伯顏之讖也劉靜修白雁行云云蓋寓言也

陳伯通

雲中人

海青馬生肝

金符飛下渥洼龍鞭影輕擣六翮風耳竅風聲聞  
花雲影疾驚鴻未容駿骨遼東老已得英名冀北空一縷

紅塵江漢捷天庭不爲荔支紅  
催薦中廚語未闌控拳豪客簇雕鞍翠翻雲葉并刀亂水  
透霜花楚玉寒一吮味甘牙齒滑十分香徹鼻頭酸夢魂  
不到鱸魚膾醉眼江湖特地寬  
驚呼乳盞意匆匆便覺餘香鼻觀通露滴水盤藍玉軟風  
生霜刃碧囊空舞娃驚濺羅衣綠酒客潛消醉臉紅若使  
昔人知此意羊頭爛熟不成功

勺

肢傷一體婁師德目眇三分李雁門

庶齋老學叢談陳伯通宣慰雲中人跛而眇自述  
云云有海青馬生肝詩云云

李庭字顯卿

咸陽懷古

連雞勢盡霸圖新  
兀兀宮牆歷渭濱  
指鹿只能欺二世  
沐猴那解定三秦  
倚天樓觀餘焦土  
落日河山幾戰塵  
今古悠悠同一轍  
不須作賦弔前人

庶齋老學叢談安西府諮議寓菴李顯卿庭咸陽懷古云云語意格筆俱妙有唐體

耶律柳溪名未詳楚材孫

剪子

體出并州性自剛  
篋中依約冷光芒  
雙環對曲蜂腰細  
疊刃齊開燕尾張  
慣愛分花沾雨露  
偏憎裁錦破鴛鴦  
可憐戍婦寒窗下  
一剪邊衣一斷腸

庶齋老學叢談宣慰耶律柳溪詠剪子詩云云

句

角端呈瑞移御營益亢問罪西域平

庶齋老學叢談耶律柳溪詩集云云注云角端曰行萬八千里能言曉四夷之音昔我聖祖皇帝出師問罪西域辛巳歲夏駐蹕鐵門關先祖中書令奏云五月二十日晚近侍人登山見異獸二目如炬鱗身五色頂有一角能人言此角端也當於見所備禮祭之此天降神物預言吉徵也

撒舉字彥舉陝人

無題

誰家金鴨暖梅魂繡戶春風半掩門桃葉等閒留暮雨梨花寂寞過黃昏盤盤鸞髻堆雲影澹澹蛾眉掃月痕常似謝家銀燭底鳳凰釵影落瑤尊

記夢

千里嶠函楚客行關河西上鐵牛城申湖亭下月初上召  
伯堂前草自生十里杏園紅雨暗一條春水碧羅平覺來  
半壁寒燈底吹落風簷暮雨聲

過沙井

沙沈石馬廢城秋劍鉞寒生古戍樓平日只疑無蜀道此  
行何處問荊州山連海塞從西斷水界龍荒盡北流一曲  
商歌才夜半朔風吹雪望牛頭

遊香山

石棧天梯落日紅誰開青壁削芙蓉捫參歷井來何暮佩  
玉鳴鑾更不逢僧去古潭雲渡水鶴陰清露月平松世間  
骨相誰潘闥誤打金陵半夜鐘

送郭祐之

南口青山北口雲天涯何地又逢君  
陌頭楊柳西行馬  
畫角三聲不忍聞

困學齋雜錄詩人撒舉性嗜酒工於詩客京師十餘年竟流落而死今得逸詩數篇信手錄之云云

鄭雲表

句

形如槁木因詩苦眉鎖蒼山得酒開

困學齋雜錄撒舉同時有鄭雲表者慕彥舉之爲人作詩挽之云云人以爲寫真云



元詩紀事卷三

侯官陳衍緝

方回字萬里號虛谷徽州歙縣人宋景定壬戌別省登  
第知嚴州元兵至迎降即以爲建德路總管尋罷  
有桐江集

秋晚雜書十首

堂堂陳去非中興以詩鳴會呂兩從橐殘月配長庚尤蕭  
范陸楊復振乾瀉聲爾後頓寂寥草蟲何薨薨永嘉有四  
靈詞工格乃平上饒有二泉旨淡骨獨清學子孰取舍吾  
非私重輕極元雖有集豈得如淵明

竊嘗評少陵便生太宗時豈獨魏鄭公論諫垂至茲天寶

得一官主昏事已危脫命走在所窮老拜拾遺卒坐鯁直  
去漂落西南陲處處苦戰鬪言言悲亂離其閒至痛者莫  
若八哀詩我無此筆力懷抱頗似之

人言太白豪其詩麗以富樂府信皆爾一掃梁隋腐餘編  
細讀之要自有樸處最於贈答篇肺腑露情懷何至昌谷  
生一一雕麗句亦焉用玉溪纂組失天趣沈宋非不工子  
昂獨高步畫肉不畫骨乃以帝閑故

六經天日月諸子如四時史自班以上語奇文亦奇踵武  
蔚宗輩語有文無之小宋刊新唐不悟宵寐覩以藝傳李  
杜待之無乃卑他人有遺集一覽不再窺惟此與韓柳咀  
嚼無厭期儕彼楓落生吾欲鐫此疵

道自漢魏降裂爲文與詩工詩或拙文文高詩或卑香區  
假山序不妨自一奇鮪橘多骨核乃至肆詆訾恭維陳無  
已此事獨兼之五七掩杜集千百臻秦碑四海紫陽翁歸  
美豈其私所以此虛叟取爲晚節師  
世稱陶謝詩陶豈謝可比池草故未凋階藥已頗綺如唐  
號元白白豈元可擬中有不同處要與分朴詭鄭圃趙昌  
父頴川韓仲止二泉豈不高顧必四靈美鹹潮生薑門彭  
蜺以爲旨未若玉山雪空鑑煮荒薺

隱居通議方紫陽序羅壽可詩曰詩學晚唐不自  
四靈始宋刻五代舊習詩有白體崑體晚唐體白  
體如李文正徐常侍昆仲王元之王漢謀崑體則  
有楊劉西崑集傳世二宋張乖崖錢僖公丁厓州  
皆是晚唐體則九僧最逼真冠萊公魯三交林和  
靖和仲先父子潘逍遙趙清獻之徒凡數十家歐

公出焉一變爲李太白韓昌黎之詩蘇子美二難相爲頡頏梅聖俞則唐體之出類者也蘇長公踵歐公而起王半山備衆體精絕句五言或三謝獨黃幾井專爲少陵秦晁莫窺其藩張文潛自然有唐風別成一宗惟呂居仁克肖陳后山棄所學學幾井黃致廣大陳極精微天下詩人北面矣立爲江西派之說銓取或不盡然陳簡齋曾文清爲渡江之巨擘乾淳以來尤范楊陸蕭其尤也高古清勁盡掃餘子又有一朱文公嘉定而降稍厭西江永嘉四靈復爲九僧晚唐體曰淺曰下然尚有餘杭二趙上饒二泉典型未泯今學詩者不於三千年間上溯下沿窮探窺索往往追逐近世六十七年間之所偏向非區區之所敢知也

雨夜雪意

洶湧風如戰蕭騷雨欲殘遙峯應有雪半夜不勝寒吾道孤燈在人寰幾枕安何當眩銀海清曉倚樓看

瀛奎律髓予丁丑之冬在桐江賦雨夜雪意云云魯齋趙君與東字賓賜和予此詩哦詩字欲安佳

何也居何亦活動勝予所倡

甲午元日

端平甲午臣八歲甲午今年又一周六十八年多少事幾人已死一人留

悵惋詩二首

鸚鵡籠開綵索寬一宵飛去爲誰歡  
早知黠嫗心腸別肯作佳人面目看  
忍著衣裳辜舊主便塗脂粉事新官  
丈夫能舉登科第可得妖雛膽不寒

一牝猶嫌將兩雄趨新背舊片時中  
陡忘前主能爲叛乍事他人更不忠  
玉椀空亡無易馬絳桃猶在未隨風  
何須苦問沙吒利自是紅顏薄老翁

句

菊花與一作生日螃蟹喚晉入醉鄉 諸公未許子爲政  
萬事無如髯絕倫 糟薑三盞酒相燭一甌茶 跳上岸  
頭須記取秀州門外鴨餛飩

癸辛雜識方回徽人也其父南遊殂於廣中回廣  
婢所生故其名及字如此喜作詩以放肆爲高有  
菊花云云又與伯機爲壽諸公云云糟薑云云又  
行林云云甲午元日云云其處鄉專以騙脅爲事  
鄉曲無不被其害者怨之切齒遂一向寓杭之三  
橋旅樓而不敢歸老而益貪淫凡遇妓則跪之畧  
無羞恥之心有二婢曰周勝雪劉玉榴方酷愛之  
而二婢實不樂也既而方遊金陵寄二婢於其母  
周姬之家恣開杜陵之門勝雪者竟爲豪客挾去  
方歸惟有悵惋而已遂作二詩云云自刻之梓揭  
之通衢無不笑者

句

何許中原惟雁見不多吾輩只鷗知 人生不作湖州守  
亦合移居住霅濱

梅磭詩話方回吟稿中有云云之句寄興甚遠又舟行苕霅間嘉其景勝賦詩云云後德祐改元爲吳興倅貳雖少酬所願亦應不作守之識

程鉅夫名文海以字行其先徽州人宋末家建昌元兵南下從季父入覲授管軍千戶官至翰林學士承旨諡文憲有雪樓集

### 七賢過關圖

長庚自是謫仙人子美逢時稷契臣風雪茫茫五君子醉吟猶得繼清塵

懷麓堂集論七賢過關圖者多矣霏雪錄所載差詳蓋黃山谷嘗題之曰眉山老書生作此圖人物

各有意態又謂七子者皆詩人不指爲誰某也予觀雪樓程鉅夫集有詩云云又嘗聞吾友倪文毅公岳稱其父嘗見舊圖人各有標目有王維者而不能悉記也

葉李字太白號亦愚杭州人至元十四年舉授浙西道

儒學提舉官至尙書右丞諡文簡

癸辛雜識葉亦愚名李先爲葉山所攻後爲李性學所窘遂以此飲恨而死蓋二人正寓其姓名云

口占

如今便一似糊麻也是人閒大丈夫筆裏無時那解有命中有處未應無百千萬世傳名節二十三年非故居寄語長安朱紫客盡心好上帝王書

輟耕錄中書右丞葉公李宋太學生上書詆賈似道公田關子不便專權誤國似道怒嗾林德夫告公泥金飾齋扁不法令獄吏鞠之云只要你做一個麻糊公即口占一詩云云遂遭黥流嶺南及蒙



恩放還與似道遇諸道以詞贈之云君來路吾歸  
路來來去去何時住公田關子竟何如國事當時  
誰汝誤雷州戶匡州戶人生會有相逢處客中頗  
恨乏蒸羊聊贈一篇長短句

### 夢中詩

通明殿逼紫微垣一朵紅雲擁至尊下土小臣勤稽首願  
將惠澤溥元元

### 紀夢

宋時豪士石曼卿帝命作主芙蓉城我才比石十無一半  
世虛負狂直名年來似有喪心疾薦共引鯨辜蒼生天誅  
未加公論涉日夕惟待鼎鑊烹何哉異夢出非想忽遇仙  
老談真情謂予夙是文昌相漏泄輕舉遭彈抨帝令墮謫  
飽憂患且使兩足蹢跚行追思善步不可得飛昇妙術絕

敢輕當時廷議祇如此汝悔當復惟相迎稽首老仙謝慈  
愍臣罪當死天子明久之寂滅一大樂蓋棺待盡無他營  
老仙笑許汝可教引領直上朝玉京通明大明二宮殿林  
木蒨萃階瑤瓊芙蓉爛熳錦欲似帝皇錫以主殿名賦詩  
奏謝九拜起玉音嘉獎旁觀榮癡人說夢聊一快我獨知  
命不少驚只恐才非曼卿敵相見慚汗應如傾從今閉目  
需帝召玉樓續記時當成兒孫自有兒孫福與農報國須  
勤耕

癸辛雜識葉亦愚右丞辛卯八月初四日夜忽夢  
老人曰汝前爲文昌相坐漏卮天機遭謫能悔過  
當復職引之至通明大明二殿俾爲主殿之職於  
是賦詩四章以謝及覺僅記其一云云於是作詩  
以紀其事云云明年壬辰二月初六日卒

元淮字國泉別號水鏡臨川人

絕句

截髮搓繩聯斷鎧  
撻旗作帶繫金創  
臥薪嘗膽經營了  
更理毛錐治溧陽

句

問歸行理輕如羽  
沿路吟詩有一船

元史類編以軍功顯閩中官至溧陽路總管嘗有詩云云溧陽爲金陵上邑至元十三年升爲溧州繼改溧陽府已升爲路淮到省乞改作直隸州小蘇民力及去任作詩云云其廉退之風可想見

李思衍字昌翁號兩山餘千人至元間授袁州治中官

至南臺御史

弔李肯齋

天地由來有廢興義無兩大一身輕封疆社稷若不死婦  
女鬚眉安用生紐解三綱重接續灰寒萬劫獨光明便當  
配食三閭廟啟迪民彝見太平

庶齋老學叢談潭帥李肯齋芾城將破舉家自刑  
繼之以火李兩山使交趾道由長沙弔云云

句

土暗塵昏天水碧風驚雨過女真黃 鬼火光中遺石馬  
仙盤柱下泣銅人

吳禮部詩話劉因夢吉詠薔薇詩色染女真黃露  
疑天水碧又薔薇酒亦用下六字常愛其佳對李  
思衍昌翁亦有一聯云云未知孰先後也李又有  
云云句對亦工

董恢

僦居

白髮蒼頭一腐儒行無轍跡住無廬鄧林萬頃青青木肯  
爲鷦鷯借一枝

翠閣朱樓鎖揜扉尋巢燕子不能歸落花吹泥東風雨遶  
遍芳簷無處依

山房隨筆至元戊寅己卯間有董恢者江陵人後  
居太原任丁角酒稅副使僦屋以居詩云云

湯仲友名益以字行更字端夫吳郡人宋亡浪迹湖海  
自號西樓有壯游詩集

### 過賈相宅

檀板歌殘陌上花過牆荆棘刺簷牙指麾已失鐵如意賜  
子甯存玉辟邪破屋春歸無主燕曲池雨產在官蛙木綿  
庵外尤愁絕月黑夜深聞鬼車

齊東野語賈氏當國十有六年近世以詩弔之者甚衆吳人湯益一詩頗爲人所稱云云

### 龔開字聖子號翠巖淮陰人

宋遺民錄附錄居吳之日高郵龔璠爲忘年友時人謂之楚兩龔以比漢之兩龔又吳萊桑海遺錄序坐無几席一子名浚每令俯伏就其背按紙作唐馬圖

### 瘦馬圖

一從雲霧降天關  
空盡天朝十二閑  
今日有誰憐瘦骨  
夕陽沙岸影如山

畫鑒卷後必題詩或贊跋皆新奇嘗自畫瘦馬題詩云云

### 劉彥章吉水人

### 題廬陵義士傳

淮海風迴吹血腥  
青原不改舊時青  
中朝將相論功賞不

及江南一白丁

江西通志劉彥章與劉桂隱劉申齋講學有詩名其題廬陵義士傳絕句云云爲時傳誦

于石字介翁婺之蘭溪人宋亡隱居不仕自號紫巖

嚴陵釣臺

拋却羊裘入漢庭偶然高臥兩忘形先生無處可伸足太

史何煩秦客星

吳禮部詩話先大父嘗言吾鄉有楊某者好爲詩多俚率獨釣臺詩可喜云虹作長竿雲作餌纖月沈鉤在江底巨鱗入手還縱之漢家鼎小難調理紫巖干介翁予早歲所師嘗記其作云云

呂起猷字微之天台人宋亡隱居

詠雪用滕字韻

天上九龍施法水人閒二鼠嚼枯藤驚鵝聲亂功收蔡

蝶飛來妙過滕

又用曇字韻

萬里江河凍欲含  
渾如天地尙函函  
三橋邊驢子詩何惡  
悵底羔兒酒正酣  
竹委長身寒郭索  
松埋短髮老瞿曇  
不如乘此擒元濟  
一洗江南草木慚

貧士傳呂微之天台人居萬山中綜博述詠安貧  
逃名常漁以自給一日携弊楮詣富家易穀露頂  
短褐布韞草履值大雪立門下人弗之顧徐至庭  
前聞閣中語貴遊子弟詠雪苦吟弗就微之嘲焉  
迺出侮之微之口占以答無不精美問其姓字終  
不言諸子弟曰嘗聞吾鄉有呂處士者欲一見而  
不能先生豈其人耶曰吾農家安知呂處士因惠  
之穀怒曰不義之貨我何庸取遂去諸子弟瞰識  
其所雪霽覓訪惟草屋壁立忽米桶內有人乃微  
之妻也天寒無衣坐爲障耳因問先生何在答曰  
溪上捕魚乃至彼見之微之臨溪曰少需之得魚  
易酒飲諸公也俄頃携魚酒至盡歡散別翼曰復



躡其蹤則已行矣  
函史一日携薪芻詣富家易穀值大雪集客閣中  
分韻賦詩一人得滕字苦吟弗就繼之寒坐因失  
笑坐客詢之曰何笑也曰偶憶滕王蛺蝶事耳衆  
知其能詩邀入坐即席賦有二云云之句坐客歎服  
隨限韻強之賦又立就時宋南多故兵革方始微  
之詩有不如乘此云云之語

### 許獻臣

案庶齋老學叢談有許獻臣僉事云云

### 賓月堂詩

人生自是人閒月客亦天邊寄此身彼此虛空無着處誰  
歟是主復誰賓

七修類稿此詩乃元人梁隆吉者而同時許獻臣  
集中亦有之此必二人友善一時不知何人誤寫  
後人因而誤刊耳

葉林字儒藻一字元文一作號本山錢唐人生宋末隱

大滌山沖天觀大德間卒衆稱高行先生

至道宮

猶存鼎鑊記熙豐翠靄春深古路通千百春鉏一株樹野  
田吹下雪花風

洞霄圖志至道宮在餘杭縣北三十里曹橋西唐  
文明元年建前有古松一圍兩合抱後有苦杏二  
大與松埒鸞鶴巢集其上廚院有宋熙寧間所鑄  
巨鑊四畔識歲月及施錢姓氏隱士葉元文詩云

絕句

金粟花前風細細寶階地上月輝輝夢回不屬紅塵境涼  
露滿衣人醉歸

句

芙蓉搖風柳挂月醉來健倒梨花堆

吳禮部詩話葉公詩如金粟云云他警句如芙蓉云云千百春鈕云云皆佳

鄧牧字牧心錢唐人隱大滌山人稱文行先生著有洞霄圖志雜文稿名伯牙琴

寄友

我在越君在吳馳書邀我遊西湖我還吳君適越遙隔三江共明月明月可望佳人參差笑言何時寫我相思知君去掃嚴陵墓祇把清尊酌黃土浮雲茫茫江水深感慨空勞弔今古孤山山下約陳實騎須來踏春色西湖千樹花正繁莫待東風吹雪積有酒如澠有肉如陵鼓趙瑟彈

秦箏與君沈醉不用醒人生行樂耳何必千秋萬歲名

吳禮部詩話李坦之早歲入道洞霄宮學文於隱者鄧牧有葉林者亦隱山中坦之出山時時誦葉鄧詩鄧有寄友云云

### 陳觀國

癸辛雜識陳觀國字用賓永嘉勝士也丙戌之夏寓越夢訪予於杭壁間有古畫數幅巖巖壑壑聳峭竹樹茂密瀑飛絕巘雁爲大池池中菡萏方盛開一翁曳杖坐巨石上仰瞻飛鶴翔舞烟雲空濛中髣髴有字數行體雜真草其辭曰水聲兮激激雲容兮茸茸千松拱綠萬荷奏紅爰宅茲巖以逸放翁屹萬仞與世隔峻一極而天通予乃控野鶴追冥鴻往來乎蓬萊之宮披海氣而一笑以觀九州之同傍一人指云此放翁詩也用賓驚寤急書以見寄詩語清古非思想所及異哉

### 送鄧牧心出陶山

青山無送迎幽人自來去落葉若相送卷卷及行屨簷端

有孤雲仍爲守其處落葉惜人不在山孤雲尙期人再還  
斯人可期復可惜我處落葉孤雲間

吳禮部詩話牧心嘗客會稽王脩竹監簿所有陳  
觀國用賓送其出陶山詩亦佳

### 連文鳳字伯正三山人

春日田園雜興

老我無心出市朝東風林壑自逍遙一犁好雨秧初種幾  
道寒泉藥旋澆放犢曉登雲外壘聽鶯時立柳邊橋池塘  
見說生新草已許吟魂入夢招

月泉吟社第一名評曰衆傑作中求其粹然無疵  
極整齊而不窘邊幅者此爲冠

月泉吟社序浦江吳渭宋時嘗爲義烏令元初退  
食於吳溪延致鄉遺老方韶父與閩謝臯羽括吳  
思齋主於家始作月泉吟社四方吟士從之三子  
者乃爲其評較揭賞云

又送詩賞小劄序預於丙戌小春望日以春日田園雜興爲題至丁亥正月望日收卷月終結局收二千七百三十五卷選中二百八十名三月三日揭榜

送詩賞劄伏以月泉吟社久盟湖海之交春日新題賸寫田園之興得周南而正始可冀北之空羣執事振響武林舒翹文苑種秋澆藥已朝市之無心放犢聽鶯更池塘之入夢杼機自別冠冕爲宜某心所甚欣手之不釋詩成奪錦誦珠玉者翕然禮以爲羅愧瓊瑤則多矣餘如元穎并致篋筐回送詩賞劄讀淵明詩久識田園之趣從夫子學願爲農圃之民未敢望其下風胡遽延之上座執事雅懷月霽清思泉寒某羨珠玉之在側忝糠粃之播前舊擬秋聲曾占桐江之風景新題春日又分婺女之星輝豈好爲朱公之變易姓名深恐蹈柳子之召閹取怒慙非重寶俾獲與錦囊之榮賜侈香羅復喚起青衫之夢受絲毫而皆感與筆墨以忘言謹述謝私伏祈鑒在案來往小劄各二十餘首錄一首以概其餘

馮澄宇澄翁義烏人

前題

編闌春思倩吟鞭著面和風軟似綿黃犢烏犍秧穀後雄  
蜂雌蝶菜花天把鋤健婦踏煙塍抱甕丈人分野泉忙事  
關心在何處流鶯不聽聽啼鵲

月泉吟社第二名起善包括兩聯說田園的而雜興寓其中末語亦不泛

楊本然字舜舉金華人

前題

春風建業馬如飛誰肯田園拂袖歸栗里久無彭澤賦松  
江僅有石湖詩踏歌槌鼓麥秧綠沽酒裹鹽菰芥肥吳下  
風流今莫續杜鵑啼處草離離

月泉吟社第七名起敘石湖出處善黏綴本題領聯引淵明爲對語有斟酌頸聯就范詩狀田園結

有悠揚不盡之興此詩若止如前半篇則於義當屬賦矣

又

露畦煙陌裏名利等秋毫引犢隨牛放祈蠶望爾縲和根挑薺菜帶葉摘櫻桃讀罷歸來賦臨風欲和陶

月泉吟社第三十六名有點檢無疎漏二聯能以俗爲雅和根帶葉雖只舊對卻轉移得好末押和陶更佳

全璧字君玉杭人

句前題

晉氏衣冠門外柳幽人風俗屋邊桑未分東風欺老眼

一編牛背臥斜陽

月泉吟社第九名見趣高格調別觀前題八字及末句語可想其人



呂文老字潛翁東陽人

前題

月箒紀閨附青煒民野陶然化日熙祀備枌榆祈稔歲宴  
酣花柳樂清時洛中富貴斜陽恨綿上勲勞千古思浩興  
歸來吟不盡陶詩和後和幽詩

月泉吟社第十名引用田園事全與諸作不同覃  
思一至於此末句亦縝密

方德麟號藏六桐江人

前題

繞畦晴綠弄潺湲倚杖東風却黯然往夢更誰憐秀麥閒  
愁空自託啼鵲犁鉏相踵地力盡花柳無私春色偏白髮  
老農猶健在一簑牛背聽鳴泉

月泉吟社第十一名送詩賞劄執事望從東安羣  
稱北冀晴畦自繞鵲聲設寄於閒愁春色雖偏牛  
背獨誇於老健細觀妙格知出清芬云云

劉汝鈞字君鼎三山人

句

前題

草坪閒見鳥犍點畚水飛來白鷺雙

月泉吟社第十二名意圓語妥五六善寫物態用  
韻尤工

翁合老字仲嘉建德人

前題

韶華到處入冥搜郭外人家事更幽土脈正融催  
陰微合聽鉤輅誰家酒熟社公醉明日桑空蠶妾  
愁祇恐春工忙裏度又吟風雨滿城秋

月泉吟社第十五名春日雜興意已具首句二聯  
工繼後聯句更高結句所引與興字相關尤有深  
味

林子明號東岡分水人

前題

一點陽和薰萬宇最饒佳致是山莊雞豚祝罷成長席鶯  
燕聽來隔短牆嗜酒不嫌多種秫無襦長恨少栽桑東郊  
勸相何煩爾農閒吾生自合忙

月泉吟社第十六名前聯細玩見田園次聯較分  
曉結意尤有含蓄

劉蒙山字崑山人

句前題

村婦祈蠶分麪親老農占歲說泥牛田鳥飛逐耕煙犢桑

扈鳴隨喚雨鳩

月泉吟社第十七名此真雜興二聯組織甚工

周暎字伯陽泰州人

前題

蛙聲似吹雨初足桑樾欲紅風始和少婦每憂蠶利薄老  
夫惟喜秫苗多舊栽花木山鶯識新買陂塘野鷺過此境  
東風元自好當年金谷事如何

月泉吟社第十九名不事排鼻而意語新妥自是  
佳作

趙必范號古一宋太宗十世孫桐江人

句前  
題

卜歲聊憑六壬課有生未識五辛盤  
既幸有漁樵同此樂

苦無車馬自相諠元幾點飛花芳徑雨一雙新燕荻簾風

日社菱白生苗藏蛤地桑黃含樾浴蠶天清

月泉吟社第三十名此卷八詩一起一結中六篇分詠三春節序曲盡田園間景態如云云皆佳句也

姚潼翔

前題

壁寫新年百事昌春盤次第蓼芽香燒燈過了爭挑菜祭  
社歸來便撒秧布穀幾聲催耜畝吳蠶三伏正條桑一春  
忙過無多日又聽鵲鵲報麥黃

月泉吟社第二十一名送詩賞劄執事氣孕蒼泱學宗葩正以俗爲雅一年先百事之書因險出奇八句盡三春之景云云

胡南字景山義烏人

前題

世數有遷革田園無古今鳥喧爭樹暖牛倦憩牆陰水活  
土膏動風微花氣深淵明千古士伫立此時心

月泉吟社第二十四名二聯俱入細末意尤永

姜霖字仲澤金華人

前題

老盆傾酒試新嘗社鼓村村鬧夕陽麥隴風微牛睡穩芹  
塘泥滑燕歸忙半村飛雨斷煙濕一徑落花流水香鼎貴  
安知此中意徒能學犬吠村莊

月泉吟社第二十六名領聯妥帖五六語尤勝末  
不雷同

東必曾字孝先杭人

前題

巽綠郊原春事深  
治生幽趣豁塵襟  
聲禽語耕人意種  
種花開老圃心  
桑葉漸舒梯欲整  
麥苗暗長路難尋  
日長雖有荷鋤倦  
薄暮歸來常醉吟

月泉吟社第二十七名終篇可謂清新之作三四尤有味

方子靜

桐江人

句前題

秧水平疇蛙閣閣  
菜花滿稜蝶飛飛  
比鄰社酒歡猶在  
牆壁農書事已非

月泉吟社第二十八名領聯停當五大有感觸三四字尤警

朱孟翁

東陽人

前題

餌釘蔬槃已竹萌如何布穀未催耕牧兒嬾散騎牛過遊  
子牽連信馬行秧際窺魚翹白鷺花間捎蝶下黃鶯東風  
歲歲添新綠獨我霜髯多幾莖

月泉吟社第二十九名平妥中用字有工二聯不  
拘體貼而題自見末感興尤深

趙必拆字

杭州人

前題

一段佳山水芳時事正妍犢耕青燒雨鶴臥碧桃煙社老  
邀嘗煮鄰僧伴摘鮮莫嫌陶令拙農圃得餘年

月泉吟社第三十名送詩賞劄執事愛雲自命與  
世相違臥碧耕青慣尋幽趣摘鮮嘗煮間對芳時



宛如驢上風雪詩不帶人間煙火氣云云

劉時可字

雙溪人

前題

土膏初動雨初收  
草逕茅亭趣最幽  
坐睡略無朝市夢  
踏歌時有里閭遊  
半邱秧秫醉堪酒  
五畝樹桑寒可裘  
老圃老農誠足學  
不成吾道付滄洲

月泉吟社第三十二名前聯語圓味永後四句婉順而有結束

許元發字

義烏人

前題

片雲豈是出山時  
曾被東風誤一吹  
歸意不煩啼鵲勸  
閒情只許落花知  
桑麻窮巷扉常掩  
煙火空林黍自炊  
栗里

輞川非謬計晴窗仔細味渠詩

月泉吟社第三十四名起善摹寫五六用淵明摩詰語卻以第七句承之可謂得格

洪貴叔字

義烏人

前題

棄官杜甫罹天寶辭令陶潛歎義熙暖日浣溪仍舊迹春風栗里只前時苗生阡陌培嘉種花繞林塘發故枝佳興二公能領會可能胸次太多詩

月泉吟社第三十五名全傲坡體

徐端甫字

義烏人

句前題

犬依桑下鳥犍臥鳩雜花閒黃鳥呼楊柳嫩搖風氣力稍

秧新著雨工夫

月泉吟社第三十七名如是而後爲雜興詩中二聯尤得趣末無奇

朱釋老號龜潭金華人

前題

家山萬象春歸好詩筆拈來感物情  
泉脈動時母待灌土膏起處正宜耕  
無窮懷抱風和暢不盡形容雨發生  
試問封侯萬里客何如守拙晉淵明

月泉吟社第三十八名前聯說田園輕快第二句體貼興字五六帶春景體貼雜興二字更工然而氣格不高亦坐此

李萼字

桐江人

前題

村居只是舊衣冠北墅南園熟往還雨外泥深牛齧棘花  
邊風暖鳥間關躬耕自得莘郊樂日涉誰知陶徑間只說  
桑麻元自好不須釋耒歎時艱

月泉吟社第三十九名全篇辭氣雍容末韻哀而不傷怨而不怒深得詩人之旨

陳君用字竹暉

前題

春風冗我田園務野思芳情約不齊檢點瓜邱仍芋壘按  
行桑墅更秧畦偶陪靈運山前屐或學東坡雨外犁薄暮  
倦歸專一事旋誅生菜甕黃齋

月泉吟社第四十名雜興甚工但失之刻露然其好處亦在此

句前  
題

芽穀驗仁脈澆花趨化工

月泉吟社第四十六名前聯平後聯有思索

蔡潭字熙山杭人

前題

雲過催花雨風收困麥煙一鋤天地裏三月翠紅邊朝市雖無夢郊墟似有緣種瓜何代叟豈識趣熙然

月泉吟社第四十一名詩人詩韻度自別起聯甚工

俞自得號吟隱金華人

句前

白鷺時窺秧刺刺黃鶯頻說柳依依幾回野水聞姑惡數樹春陰叫姊歸

月泉吟社第四十二名語新而對巧所謂多識於鳥獸草木之名但未二句不過敷衍起句耳

王進之字

建德人

句前

桑田滄海幾興亡歲歲東風自扇揚細麥新秧隨意長閒  
花幽草爲誰芳

月泉吟社第四十七名有悠長味無艱澀語後半篇視前畧不及

又

物意豈知滄海變曉風依舊語流鶯

月泉吟社第四十九名以雅健語寫高潔操攸然之興見於篇末

陳希聲字

義烏人

前題

香紅眩眼纈蕤英竹杖扶吟縱步行桑眼曠含青薄小麥  
鬚蝦磔翠芒輕黃花菜圃午風軟綠水秧畦春野平芳樹  
幾聲鳩雨過蒼蒼柳色弄烟晴

犁鉏徧野泐耕農血吻鵲聲一樹紅畦蠹秧針青剌剌隴  
翻麥浪翠芄芄雞鳴晝寂花村雨蛤吠朝寒草岸風溪外  
雲過橫笛亂微烟野色樹龍蔥

月泉吟社第五十名回文二首俱妥順亦出苦心  
又第五十一名三春分作二首曲盡變態非苟爲  
敷演者所能及

戴東老

前題三首 錄一

飲了椒盤收了燈翁攜稚子步新晴茅柴初熟勝臘醞菜

服久齋宜晚羹伏卵雞留上春種出欄牛試吉辰耕去年  
官賦今年罷寂甚柴門犬吠聲

月泉吟社第五十二名三詩狀三春之景得處亦多起頭一句欠嚴重

陳文增字 茗水人

句前  
題

熙熙壘畝扇和風簇簇人煙野意濃 飲牛澗暖山搖影  
接果枝青蘚坼封

月泉吟社第五十四名起見題意兩聯中五六尤工

劉存行

句

麥苗花下綠犢子草邊黃



傅宣山

又

生意滿腔映出穀飛花有絮柳飄綿

柳耆

又

野犢正忙犁曉雨谷鶯纔出管東風

俞如山

又

鳥隨牛後窺秧穀蝶趁蜂來戀菜花

翁自適

又

鴉趁犁翻爭啄食蜂黏絮落苦貪香

郭建德

又

煙連草色迷平野雨趁鳩聲過別村

駱仞寶

又

烹罷鑊龍新上筍脩來秧馬尙依牆

陳帝臣

又

清曉蛙聲引啼鳩夕陽牛背立歸鴉

俞堃山

又

郎罷耕田呼罔牧阿翁眠起問姑蠶

林泉生

又

桃李公門者將蕪胡不歸

傅九萬

又

笑他思著蓴鱸者却感秋風始去官

月泉吟社摘句圖起句云云聯句云云結句云云

魯仕能

句

萬劫灰中藏世界千層浪裏惜儒珍

吳鉞

句

阮藉摩挲青眼舊鄒陽感慨白頭新

李應春

句

象繪耆英希五老鶴歸華表認千年

羅太岳

句

素絲不改衣冠舊黃道從教日月新

羅太亨

句

且追白社爲耆會縱買黃金肯少年 勢利朋儔隨處有

詩章我輩逐年無

湖南通志元九老題名詩石在平江道嚴葆真觀  
宋遺民魯仕能年七十三吳鉞魯仕行鄧希恕年  
七十七方采李應春年六十九張萬全年六十七  
羅太田年六十二羅太亨年六十皆平江人於至  
元間擇山水勝處更迭主會凡歷十三年各題姓  
名及詩刻於石仕能句云云斬句云云應春句云  
云太田句云云太亨句云云太亨因會散悼諸友  
句云云

林清

八音詩

金紫何曾一掛懷石田茅屋自天開絲竿釣月江頭住竹  
杖挑雲嶺上來匏實曉收栽藥圃土花春長讀書臺革除

一點浮雲慮木筆題詩酒數盃

百可漫志禮侍部齋林先生誌祖清避元不仕變  
易姓名匿居山寺會府君檢冊寺中見清詰問且  
曰能詩乎即以冊號八音命爲詩應聲云云府君  
驚羨遂與爲友

熊朋來字與可豫章人登宋咸淳進士第八元仕爲教  
授

豫章鐵柱宮

九牧失貢金司空不行水蛟龍弄波濤魑魅入城市吁嗟  
清談者萬事謾不理遂令千載人稽首旌陽子

江西通志豫章鐵柱宮井中鐵柱歷代名賢多有  
題詠熊朋來詩云云